

Tutu ni tee Pablo nuu ñayiu ka skua'a ñuu Filipo

¹ Maa san kuu Pablo vi Timoteo ja ka jino-kuechi san nuu Jesukristu, te ka tee san tutu ya'a nuu ndi'i maa ni ja ka kuu ni ñayiu maa ia Dios ja ka oo ni jin Jesukristu, vi nuu tee ka tatnuni ne'u ni, vi nuu tee ka chituu ña jin ni, ja ka oo ni ñuu Filipo. ² Te maa Tata Yuao jin Jito'o Jesukristu na chindee chituu ña ya, te vi koo ni jin jamani ya.

Jikanta'u Pablo ja ja'a ñayiu ka skua'a

³ Ndakuanta'u san nuu ia Dios in in jichi ja ndaka'an ña san jin in in ni. ⁴ Te nuu ndakuatu san, siun ni jikanta'u san nuu Dios ja ja'a ndi'i ni, te kusii ndeva'a ini san. ⁵ Chi ndee kiuu xtnañu'u ja ni ka kandija ni tno'o ya jin ndee vitna, ka chituu tna'o ja ka xtutenuo tno'o va'a Kristu. ⁶ Te kukanu ndaa ini san jin ya'a: Ja maa ia Dios ni skeja'a tniuu gua'a nuu ndi'i ni, te siun ni kosa'a ya ja vi kuja gua'a ni nuu tno'o ya, guaa ndee kiuu ja na ndajiokuiin Jesukristu. ⁷ Te watu ka kuu ja siun ndakani ini san ja ja'a ndi'i ni, chi vi anu san ka ñu'u ni, chi inuu ni ni chindee ni chituu ña ia Dios jion, nuu yi'i san vekaa axi nuu oo san nuu nda'a tee ka netniuu ja ka'an ni'nu san ja ja'a tno'o va'a Kristu ja tno'o ndaa kuu. ⁸ Te maa ia Dios ja jini ja kutoo vii ña san jin ndi'i ni, nagua vii kutoo ña Jesukristu jion. ⁹ Te nuu ndakuatu san, jikanta'u ña san nuu ia Dios ja na

chituu ña ya ja vi kokutoo tna'a gua'a ka ni, te vi jinkui'nu kaji ini ni ndi'i nagua kuini maa ia Dios ja vi sa'a ni. ¹⁰ Nagua ja saa, te vi kuni ni vi kaji ni jagua'a ka, nagua ja vi kokuu ni ñayiu ndaa, ja tu na kuechi vi kotavi ni kiuu na ndenta Kristu. ¹¹ Saa, te kaya kua'a tniuu gua'a tniuu ndaa ja ka sa'a ni jin ma'ñu sagua Jesukristu, nagua ja vi chiñu'u ñayiu ia Dios ja ia vii ia va'a kuu ya.

Ja ka tekuo kuu ja ka chiñu'o Kristu

¹² Kuini san ja vi kuni ni, vi ñani vi kua'a, ja tnundo'o ja tna'a san ya'a chituu ña ja kutenuu gua'a ka tno'o va'a Kristu. ¹³ Te yun kuu ja ndi'i tee ka kuu soldado nuu ve'e tniuu ya'a vi sava ka ñayiu, ja ka jini gua'i ja oo san vekaa ya'a ja jinokuechi san nuu Kristu. ¹⁴ Te nuu ni ka jini ñanio vi kua'o ja oo san vekaa ya'a, te kua'i ni ka kundee ini nuu Jito'o, te vi ni ini ni anui ni ka ndakani tno'o va'a ia Dios nuu ñayiu, te tu ni ka yu'i.

¹⁵ Te jandaa kuu ja sava ñayiu, chi vi chia inu kuasun ni ini, guaa ka ka'in tno'o va'a Kristu, ja ka ndukui ja vi kokuu ka'nu kai. Su savai, chi ka ndakani va'a ini ja ka ndakani tno'o ya. ¹⁶ Te savai ka ndakani tno'o va'a Kristu, chi ka ndukui ja va'a mai, te masu jin ndee ini ndee anui ka ka'in, chi ja ka kuini kuu ja na tna'a ka san tno'o suchi ini, vitna ja yi'i san vekaa ya'a. ¹⁷ Su sava kai, chi ka sa'i ja ka kutoo ñai jin san, chi ka jini ja maa ia Dios ni jani ña jin san ja ka'an ni'nu san ja ja'a tno'o va'a Kristu. ¹⁸ Su tu na ndakantno'o, a ka ndakani ndai tno'o Kristu axi chia inu jani

ini, su ja maa san, chi kusii ini san ja ka ndakani tno'o ya.

Te vivi'i ka kokusii ini san. ¹⁹ Chi jini san ja ka ndakuatu ni ja ja'a san vi ja chituu ña Espiritu Jesukristu jin san, te suu sa'a ja kaku san. ²⁰ Chi ja kuini san vi ndetu ka'nu san kuu ja ma kuantu ndia'a maa ia Dios ja ni'i san tno'o kanoo, chi sua'a vi ni ini ni anu san na ndakani san tno'o ya, nagua ja vitna vi siun ni kosa'a ka'nu san Kristu, te tu ni ja sa'i a koteku san axi kuu san. ²¹ Ja maa san, chi ja tekku san kuu ja chiñu'u san Kristu. Te ja kuu san kuu ja kundee san ja ki'in san koo san jin ya. ²² Su nuu ja na koteku ni san, te kuu satniuu ka san ja vi kaya ka ñayiu vi kandija Kristu nuu siun. Te yun guaa tu jini san ndeja kuu jagua'a ka ja kaji san, a ja koteku san axi ja kuu san. ²³ Chi ka oo uu ichi ya'a, te tu jini san nagua kuu ja sa'a san: In kuu ja kuini san ja kuu san nagua ki'in san koo san jin Jesukristu andivi, chi yun kuu jagua'a ka. ²⁴ Su inka kuu ja koteku ni san, chi yun kuu ja kanuu ka ja ja'a in in maa ni. ²⁵ Te yun kukanu ini san, te jini san ja koteku ka san ja vi koo nunuu kao, nagua ja chituu ña san ja vi koyutnu ka ni jin tno'o ka kandija ni, te vi kokusii ini ni. ²⁶ Te saa nagua ja nuu ndajiokuiin san inka jichi ja ndajakoto ña san, te yun sa'a ja vi kokusii ini ka ni nuu ka chiñu'u ni Jesukristu ja jito ña ya jin san.

²⁷ Te ja kanuu ka kuu ja vi nduku ndee ni ja vi kaka ndaa ni, te vi sa'a ni nagua kuini maa tno'o va'a Kristu, te inuu ni kuu a jaa san ja jakoto ña san axi ma jaa san. Su kuini san konini san ja vi ka'an ñayiu ja ka oo yutnu ni, vi inuu ka ndakani

ini ni, vi inuu ka nduku ndee ni ka kaxtno'o ni tno'o va'a Kristu ja ka kandija ni. ²⁸ Te ma vi kuandetu ni ja vi siu'u ña ñayiu ka ndakoo siki ni, chi ja ka ndakoi yun xne'e kaji ja ki'inkuei vi nai, te suni xne'e ja maa ni, chi vi kaku ni'nu ni, te ndi'i ya'a vaji nuu maa ia Dios. ²⁹ Chi ja ja'a maa Kristu kuu ja ni ka ni'i ta'u ni ja masu maintno'o ni ja ka kandija ni ya, chi suni ja ka tna'a ni tnundo'o ja ja'a ya. ³⁰ Te inuu ni ka ndo'o nuu ka tna'o tnundo'o, chi ja ka jini maa ni naxa ni tna'a san tnundo'o nuu ni ka kagua tna'a san jin ñayiu nuu ni ka oo ñuu jian, vi suni ka jini so'o ni vitna naxa tna'a san tnundo'o ya'a.

2

Ni sa'a nda'u Kristu maa ya te ni ndasa'a ka'nu ña Tata Dios

¹ Nuusaa te ja ka oo ni jin Kristu kuu ja ka ni'i ni tno'o ndee ini, te ja kutoo ña ya kuu ja ka oo sii ini ni, te oo Espíritu ya ini anu ni, te ka kutoo tna'a ndeva'a ni vi ka kuu nda'u ini tna'a ni. ² Te yun guaa vi ndataa ni tno'o sii ini nuu san, te inuu ni vi ndakani ini ni, vi inuu ni vi ka'an too tna'a ni, vi inuu ni vi koo ini anu ni vi jajintnuni ni. ³ Ma vi sa'a ni in tniuu ja vi sa'a teyii ni maa ni, axi ja vi kendoo va'a maa ni. Vi sa'a nda'u ni maa ni, te vi kani ini in in maa ni ja sava ka ñayiu, chi ka kuu na'nu kai saa maa ni. ⁴ Te ni in ni ma vi nduku ni ja vi kendoo va'a maintno'o maa ni, chi suni vi nduku ni ja na vi kendoo va'a sava ka ñayiu.

⁵ Te in in maa ni, vi ndakani ini ni nagua ni ndakani ini Jesukristu.

6 Chi visi inuu ni kuu ya jin Tata Dios, su tu ni nduku ya ja koo ya jin ndi'i jayiñu'u oo nuu ia Dios.

7 Chi sua'a ni xndendoo ya ja ni okuu ka'nu ya, te ni nduu ya in tee jinokuechi, ja ni kaku ya nagua ka kaku ndi'i ñayiu ñuyiu.

8 Te nuu ni nduu ya in teyii, te ni sa'a nda'u ya maa ya, te ni jantno'o ya nuu ia Dios guaa ndee nuu ni ji'i ya, visi ni ka jatakaa ña jin ya in yika cruz.

9 Te yun guaa ni sa'a ka'nu ña ia Dios jin ya ja kuu ya in ia ka'nu ndeva'a.

Te ni jiña'a ya in sivi ja kuu ka'nu ndeva'a ka nuu ndi'i sivi.

10 Nagua ja jin sivi maa Jesús, te vi jinkuiin jiti ndi'i nagua ka oo andivi, vi ñayiu ka oo ñuyiu, vi ndi'i nagua ka oo chii ñu'u ja vi chiñu'i nuu ya.

11 Te saa nagua ja ndi'i ñayiu vi ndaa yu'u, te vi ka'in ja Jesukristu kuu maa Jito'o, nagua ja vi konei jayiñu'u nuu Tata Dios.

Xteku ña Pablo ja vi kuantno'o gua'a ñayiu ka kandija

12 Nuu saa, vi ñani vi kua'a ja ka'an too ña san, nagua ni ka oiantno'o ni tno'o ni kaxtno'o san nuu ni ka oo, te vi kuantno'o gua'a ka ni vitna ja oo jika san, te vi kondi'ni ni ja vi kaka ndaa ni jin tno'o ja ni skaku ni'nu ña ya jin ni, te vi sa'a nda'u ni maa ni ja ka yu'u ni'nu ni ya. 13 Chi Dios kuu ia sa'a ja ka kii ini ni ja vi sa'a ni, vi ja vi sa'a va'a ni nagua kuini maa ya.

14 Te vi sa'a ni ndi'i ya'a, su ma vi koka'an kuechi ni, te ni ma vi kotee tna'a ni, 15 nagua ja ni in ñayiu ma vi nuku'un yika kuechi ni ja ka kuu ni ñayiu ndaa, te vi xne'e ni ja se'e ia Dios ka kuu ni, vi ñayiu vii ne'u ñayiu ne'e ñayiu yichi yun. Te ne'u ñayiu yun vi koye'e ni na kuinio kimi ja ka ye'e ti andivi tno'o jakuaa, 16 chi ka tava'a gua'a ni tno'o taa ja ka tekuo nikuii nikani. Te nuu ja saa ka sa'a ni, te kokusii ini san ja ja'a ni kiuu na ndenta Kristu ja tu ni jiondita uun san, ni tu ni satniuu uun san. 17 Te visi na tna'a san kuakua'a tnundo'o ja soko san maa san nuu ia Dios, ja nitna'a jin ja ka soko maa ni ja ka jinokuechi ni nuu ya, chi ka kandija ni ya, te kusii ini san vi ndataa san tno'o sii ini. 18 Te suni vi kokusii ini ni nuu ia Dios, te vi ndataa ni tno'o sii ini ja na vi kokusii inio.

Ni tetniuu ña Pablo jin Timoteo vi Epafrodito ja vi nukoto de ñayiu ka skua'a ñuu Filipino

19 Te ndetu ka'nu san nuu Jito'o Jesukristu ja kuu tetniuu ñama san Timoteo jaa de nuu ka oo ni, nagua ja ndusii ini san nuu na ndani'i tno'o san naxa ka kuu ni. 20 Chi tu na inka tee ja ndakani inuu ini jin san, ja vi ja ndaa ja ndi'ni de ja vi koo va'a ndi'ni. 21 Chi ndi'i de ka nduku de java'a maaa de, te masu ka nduku de nagua kuini maa Jesukristu. 22 Su ja ka jini maa ni ja Timoteo, chi jinokuechi gua'a de nuu Dios nuu ni chituu ña de ja ni ka kaxtno'o san tno'o va'a Kristu, nagua chituu in se'e jin tatai. 23 Te yun guaa ndetu ka'nu san ja tetniuu san de jaa de nuu na kukanu ini san naxa kaa ja ndo'o san.

24 Su ndetu ka'nu san nuu Jito'o ja suni ñama jaa maa san ja jakoto ña san jin ndi'i ni.

25 Su ni ndakani ini san ja nini kuu ja ndatet-niuu san ñanio Epafrodito ja ndajakoto ña de. Suu de kuu tee ka satniuu jin san ja ni ka nduku ndee san ka chituu tna'a san ja ka xtutenuu san tno'o va'a ia Dios. Maa de kuu tee ni ka tetniuu maa ni ja chituu ña de jin ndi'i ja ja'ni ña jin san.

26 Te ndioo ndeva'a ini de ja jaa de ndajakoto ña de jin ndi'i ni. Chi ni kusuchi ndeva'a ini de ja ni ka ni'i tno'o ni ja ni oku'u de. 27 Te ja ndaa ndija ja ni oku'u de, te vi ja yatni ni ka ja kuu de, su ni kunda'u ini ña ia Dios jin de.

Te masu maintno'o ni de ni kunda'u ini ña ia Dios, chi suni ni kunda'u ini ña ya jin maa san, nagua ja ma koneva'a ka san tno'o suchi ini ja na kuu de. 28 Te yun guaa ñama kuiti tetniuu san de ja jaa de, nagua ja nuu vi ndakuni tuku ni de, te vi ndusii ini ni, nagua ja ndusii ini san.

29 Vi kuenta'u ni de jin tno'o sii ini, chi in tee jinokuechi nuu Jito'o kuu de, te vi konee yiñu'u ni nuu tee ka kuu na kuinio tee ya'a, 30 chi vi ja yatni ni ka ja kuu de ja satniuu de ja ja'a Kristu, chi ni tnaa de maa de nuu tnundo'o ja ni chituu ña de jin san nuu tniuu in in maa ni, ja ña ni kuu ja vi chituu ña ni jin san.

3

Kusii ini Pablo ja oo de jin Jesukristu

1 Te vitna, vi ñani vi kua'a, vi kokusii ini ni nuu Jito'o Jesukristu. Ja maa san, chi tu tunini san ja ndajiokuiin san tee tuku san tno'o ja ja ni tee san, chi tno'o ja ka kukanu ini maa ni kuu.

² Te vi koto ni maa ni jin tee ni kiukuei ne'u maa ni ja ka sa'a de tniuu kue'e ja ka kuu de na kuinio ti'ina. Te ka kaxtno'o de ja chitnuni teyii nuu yiki kuñu de nagua ja vi koo gua'a de nuu ia Dios.

³ Chi mao ka kuu ñayiu ja ka yitnuni ndija ini anuo, chi ka jinokuechio nuu ia Dios jin ma'ñu sagua Espíritu ya, te ka kusii inio ja ka oo jin Jesukristu. Te tu ka kandijao ja vi koo gua'o nuu ia Dios jin naxa ka oo jin yiki kuñuo.

⁴ Chi visi suni maa san, chi kuu kandija san ja oo gua'a san nuu ia Dios jin yiki kuñu maa san. Te nuu ja ndee in ñayiu ndakani ini ja oo gua'i nuu ia Dios jin yiki kuñui, te vi'i ka tu sein.

⁵ Chi ni ka chitnuni nuu yiki kuñu san nuu una kiuu ja ni kaku san, nagua tatnuni maa Ley, chi tatatno'o ñayiu Israel kuu san, chi ndikin tata maa Benjamín kuu san, chi tee hebreo kuu san, chi yua si'i san ka kuu hebreo. Te fariseo ni okuu san, chi ni yinduu san nuu ka skua'a guagua'a naxa kei ka'an Ley Moisés.

⁶ Te vi ja kukuiñu ndeva'a san jin ia Dios, yun guaa ni osondikin san ñayiu ka skua'a ja sa'a san jin in jakue'e. Te ni in ñayiu ma kuu ka'an kuechi siki san, chi teyii ndaa kuu san ja skunkuu ndaa kuiti san nuu Ley.

⁷ Su ndi'i ja ni ondakani ini san ama ka ja kuu in jagua'a ndeva'a nuu ia Dios, te vitna jini san ja tu nagua jiniu'u sa'un ka nuu san ja ja'a Kristu.

⁸ Te ja ndaa ndija ja tu kukanu ini ka san ndi'i yun, chi in jagua'a ka kuu ja jini guagua'a san Jito'o san Jesukristu. Te ja ja'a maa ya kuu ja tu ndi'ni ka san ndi'i yun, te ndia'a san na kuinio in mi'i, nagua ja kundee san ja koo san jin Kristu.

⁹ Te oo san jin ya, su masu ja kuu maa san in tee ndaa nuu ya ja skunkuu san

Ley, chi ja kandija san Kristu kuu ja kuu san in tee ndaa nuu ia Dios jin ma'ñu sagua ja kandija san ya. ¹⁰ Te kuini san ja kuni gua'a ka san Kristu, te koo san jin jaka'nu ia Dios ja ni ndaxteku ña jin Kristu. Te suni kuini san tna'a san tnundo'o nagua ni ndo'o ya, te na koo san nagua ni oo ya nuu ni ji'i ya, ¹¹ te ndetu ka'nu san ja kenta san ja ndateku san ne'u ndiyi.

Nduku ndee Pablo ja skunkuu gua'a de nuu ia Dios

¹² Su masu ka'an san ja ja ni ni'i san ndi'i ja ni ka'an san ya'a. Te ni masu ja kuu san tee ndaa ja tu na yika kuechi san, chi sua'a nduku ndee san kua'an san guaa ndee na kenta san ja na koo san nagua kuini maa Jesukristu nuu ni nuku'un xtnañu'u ka ña ya jin san. ¹³ Ñani, kua'a, ka'an maa san ja kuini ka ja kenta san ni'i san ndi'i ya'a, su ja sa'a san kuu ja ndunaa ndija ini san ja ni kendoo ichi yata san, te nduku ndee san ja ni'i san ja oo ichi kua'on sua'a, ¹⁴ nagua ja na kenta san ja ni'i san, in ja skuta'u ña ia Dios nuu ni kana ña ya ndee andivi jin ma'ñu sagua Jesukristu.

¹⁵ Te yun guaa ndi'i yoon ja ka ka'on ja ka oo yutnuo jin tno'o ka kandijao, kuini ja inuu vi ndakani inio. Su nuu ja siin ka ndakani ini ni, te suni maa ia Dios na kaxtno'o kaji ya naxa vi jinkui'nu ini ni. ¹⁶ Su visi ni saa, te nini kuu ja inuu vi kondikion ja vi sa'o nagua kaxtno'o ya nuu.

¹⁷ Ñani, kua'a, vi sa'a ni nagua sa'a maa san, te vi kondia'a ni naxa ka oo sava ka ñayiu ka

ndikin taniñu nagua ni ka kutua'a ni nuu san. ¹⁸ Chi ja ni kuu kua'a jichi ka'an san, te vi jaku san jin tenuu san ka'an tuku san vitna, ja ka oo kua'a ñayiu ka skexiko nagua ni sa'a Jesukristu ja ni ji'i ya ja ja'o nuu cruz. ¹⁹ Te nuu kentakuei ñayiu yun kuu ja vi nai, chi ka chiñu'u ñayiu yun ja ndioo ini yiki kuñui, te ka sa'a teyii mai nuu tniuu ja vi kukanoi, te maa ni ja oo ñuyiu ya'a ka ndakani ini. ²⁰ Su yoon, chi ñayiu ñuu andivi ka kuo, te ka ndetu ka'nuo ja ndee andivi yun ndii Jito'o Jesukristu, ia skaku ni'nu ña jion, ²¹ te ndasama ya yiki kuñu nda'u ja ka neva'o, nagua ja vi nduo nagua vii kaa yiki kuñu maa ya nuu ni ndateku ya. Te jin jaka'nu neva'a ya tatnuni ya nuu ndi'i yun.

4

Siun ni vi kosii ini ni nuu Jito'o Jesukristu

¹ Te yun kuu ja vi koyutnu ni nuu Jito'o, vi ñani vi kua'a, ja ka'an too ndeva'a ña san. Te ndioo ndeva'a ini san ja ndakuni ña san, chi maa ni ka kuu in ja sii ini san vi in ja ni kundee san ja ni kuta'u san nuu ia Dios.

² Te jikanta'u san nuu Evodia vi nuu Síntique ja inuu na vi ndakani ini nduu ña, chi in ni ku'u ka kandija Jito'o ka kuu ña. ³ Te suni saa ni jikanta'u san nuu maa ni ja kuu ni tee ndaa ja ni ka chituu tna'o nuu ni ka satniuo, ja vi chituu ni nduu ña'a ya'a ja na vi koo mani ña, chi ni ka nduku ndee san jin ña ja ni ka ndakani san tno'o va'a Kristu, nduu ña jin Clemente vi sava ka ñayiu ni ka chituu ña jin san ja ni ka satniuu

san. Te ni ka jinkoso sivi ndi'i nuu liuru ja ka yoso sivi ñayiu ka teku nikuii nikani.

⁴ Te siun ni vi kokusii ini ni nuu Jito'o. Te ka'an tuku san inka jichi ja vi kokusii ini ni. ⁵ Vi kokuu ni ñayiu vii ñayiu va'a nagua ja ndi'i ñayiu na vi kuni. Chi ja oo yatni ja ndii Jito'o Jesukristu.

⁶ Te ma vi kondi'ni ndeva'a ni nagua kuu, chi sua'a vi kakanta'u ni nuu ia Dios, te vi kakan ni nagua ja'ni ña jin ni nuu ka ndakuatu ni, te suni vi ndakuanta'u ni nuu ya. ⁷ Te jamani ia Dios kuu in jaka'nu ndeva'a ja vini ja ma vi jinkui'nu inio naxa sa'a ya. Te jamani ya na tava'a anu ni vi jajintnuni ni, chi ka oo ni jin Jesukristu.

Vi ndakani ini ni nagua kuu jagua'a ka

⁸ In jasandi'i ni ka, vi ñani, vi kua'a, kuu ja vi ndakani ini ni ndi'i nagua kuu jandaa, ndi'i ja tu xnda'u ña, ndi'i jayiñu'u, ndi'i javii, ndi'i jagua'a, ndi'i ja teku tno'o gua'a. Te yun guaa vi ndakani ini ni ndi'i javii java'a vi ja vi konee yiñu'u ñayiu nuu ia Dios. ⁹ Vi sa'a ni ndi'i nagua ni kaxtno'o san, te ni ka janta'u ni, vi nagua ni ka onini ni ja ni ka'an san, vi nagua ni ka ondia'a ni ja ni sa'a san, te vi koo ni jin maa Dios, ia taa jamani ya.

Ndakuanta'u Pablo ja ni ka chituu ña ñayiu Filipino jin de

¹⁰ Kusii ini ndeva'a san nuu Jito'o ja ni ka ndaka'an tuku ña ni jin san, te ka chituu ña ni, su masu ka'an san ja ni ka ndunaa ini ña ni, maa ni ja tu ni kuu naxa vi chituu ña ni jin san.

¹¹ Te masu ka'an san tno'o ya'a ja ja'ni ña jin san, chi ja ni kutua'a san ja oo sii ini san naxa ni na ndo'o san. ¹² Chi ja jini san naxa kokuu

nda'u san, te suni jini san koneva'a kua'a san. Ja ni kutua'a san ja oo sii ini san naxa ni na ndo'o san, a ja ku'un chitu chii san axi ja kokokin san, a ja koneva'a kua'a san axi ja koka'ni ña jin san. ¹³ Ndi'i ni ja kuu kuandee ini san, chi maa Kristu taa jandakui san. ¹⁴ Su visi ni saa, te vatuka ni ka sa'a ni, ja ni ka chituu ña ni jin tnundo'o tna'a san ya'a.

¹⁵ Te maa ni, ñayiu ñuu Filipo, suni ja ka jini ni ja nuu ni jinkondee san kaxtno'o san tno'o va'a Kristu, nani kee san Macedonia jian vaji san, te ni in veñu'u tu ni ka ndi'ni ñayiu ja vi chituu ñai jin san ja xtutenuu san tno'o va'a Kristu, chi maintno'o veñu'u maa ni, guaa ni ka chituu ña ni jin san. ¹⁶ Chi na ni oo san ñuu Tesalónica, te in uu jichi ni ka tetniuu ni nagua ja'ni ña jin san. ¹⁷ Te masu maa ni nduku san ja vi skuta'u ña ni jin san, chi ja nduku san kuu ja na kaya ka java'a vi ni'i ni nuu maa ia Dios. ¹⁸ Su ja ni ndani'i san ndi'i ja ni ka tetniuu ni, te vi saa ndoo ka, chi neva'a kua'a san ja ni ka tetniuu ni yinda'a Epafrodito. Te ja ni ka skuta'u ña ni ya'a kuu na kuinio suja vixin ja nuu kai, te ja'an xiko asin nuu ia Dios, in ja ka soko ni ja janta'u ya vi junkuaan ini ya. ¹⁹ Te maa ia Dios na taa ya jin ma'ñu sagua Jesukristu ndi'i nagua ka ja'ni ña jin in in ni, na kuu na kuu jin ja kuika ndeva'a ya ja ye'e tajan. ²⁰ Te na koo jayiñu'u nuu Tatao Dios nikuii nikani. Saa na kokuu.

Tno'o sandi'i ni ka

²¹ Vi kuña'a ni nuu ndi'i ñayiu maa ia Dios ja ka kandijai Jesukristu, ja ndakan tno'o san jin, ¿a

kukueni ka oi? Te suni ñanio vi kua'o ja ka oo jin san ya'a, ka ndakan tno'o ña, ¿a kukueni ka oo ni? ²² Te suni ndi'i ñayiu maa ia Dios ja ka oo jin san ya'a, ka ndakan tno'o ña, ¿a kukueni ka oo ni? Te suni saa ni ka ndakan tno'o ña ñayiu ka jinokuechi nuu tee tatnuni ndee Roma.

²³ Te maa Jito'o Jesukristu na chituu ña ya, te na koto na kuni ña ya jin ndi'i ni.
Saa na kokuu.

Tutu ii - Ka'an ia Dios nuu ndi'i ñayiu
Mixtec, Northern Tlaxiaco: Tutu ii - Ka'an ia Dios
nuu ndi'i ñayiu New Testament+
La Santa Biblia en el mixteco del norte de Tlaxiaco
copyright © 2016 Wycliffe Bible Translators, Inc.

Language: Mixtec, Northern Tlaxiaco

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Feb 2024 from source
files dated 29 Jan 2022

1d46d274-fabd-5c6b-bfec-c3e776510466